

Uunga siunnersuut:

Sanaartornermi neqerooruteqartitsisarneq pillugu Inatsisartut inatsisaata allannguutissaatut siunnersuut (neqeroortitsinermik inatsit)

(najukkani pissutsit eqqarsaatigalugit, neqerooruteqartunik ilaajunnaarsitsineq kiisalu
teknikikkut siunnersuinerit aamma illuliornermi sanaartornermilu atugassanik atortussanik
il.il. pilersuinerit ilanngunneri)

§ 1

Sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi, tak. Namminersorlutik Oqartussanut nalunaarutaat nr. 9, 20. august 2021-meersoq, imatut allannguisoqassaaq:

1. § 1, imm. 1, imatut oqaasertalerneqassaaq:

”Inatsit ukunani neqeroorutiniq piniarnermut suliaakiiisummillu tunniussinermut atuuppoq:

- 1) illuliornissamik sanaartornissamillu pilersaarusiornernut imaluunniit suliarinerinut,
- 2) illuliornermut sanaartornermullu teknikikkut ikiuunnernut, aamma
- 3) illuliornernermi sanaartornermilu atugassanik atortussanik il.il. pilersuinerimut.”

2. § 2 imatut oqaasertalerneqassaaq:

” § 2. Illuliornermi sanaartornermilu atatillugu paasineqassaaq sulinerit sanaartorfiusumi, illuliorfiusumi, sanaartukkami, atortumi, nunaminertami imaluunniit imaani aalajangersimasumik tigussaasumik inernerup pissarsiarinissaanik siunertaqartut, tassunga ilanngullugit atortunik sanaartukkanillu sanaartorneq allannguinerluunniit, isaterineq ikkussueqqinnerlu kiisalu iluarsaassineq aserfallatsaaliinerlu.”

3. § 2-p kingorna ilanngunneqarpoq:

” § 2 a. Soqutigisallit akkerliinneritut paasineqassaaq pissutsini siunnersorti, neqeroortitsisoq sinnerlugu iliuuseqartoq, aamma neqeroortitsinerup ingerlannerata naammassiniarnerani peqataasoq, imaluunniit ingerlatsinerup inaarneqarnissaanut sunnuteqarsinnaasoq, toqqaannartumik toqqaannangitsumilluunniit aningaasaqarnikkut, aningaasarsiornikkut allatigulluunniit annertuutigut soqutigisaqartoq, neqeroortitsinerup ingerlanneranut atatillugu pineqartup kinaassusiunnginneranut attaviitsuuneranillu navianartortitsinnaasoq, imaluunniit siunnersortip attuumassuteqarpallaarneranik kinguneqarsinnaasoq.”

4. § 3, imm. 1, oqaaseqatigiit siulliit ima oqaasertaqassapput:

”Inatsimmi matumani suliariumannittussarsiuussinertut paasineqassaaq suliassaq imatut neqeroorutigineqassasoq, piffissap aalajangersimasup ataatsip iluani aamma neqerooruteqartitsinermi tunngavissat assigiit imaluunniit piumasaqaatit minnerpaaffissaat

tamanut atuuttut tunngavigalugit arlallit atuuttussamik neqerooruteqassasut, imaluunniit suliaasaq pillugu suleqatigiinnissamik pisussaaffiliisumik isumaqatigiissuteqarluni neqerooruteqassasut.”

5. § 3, imm. 2, imatut oqaasertalerneqassaaq:

” *Imm. 2.* Tamanut ammasumik suliariumannittussarsiuussinermi pisortat suliariumannittussarsiuussinermi nittartagaatigut allagarsiinikkut kikkunnulluunniit neqerooruteqarnissamut kajumissaarisooqarpoq.”

6. § 5 imatut oqaasertalerneqassaaq:

” **§ 5.** Sinaakkutissatut isumaqatigiissutitut paasineqassaaq piffissaliussap aalajangersimasup iluani sanaartugassat assigiit sananeqarsinnaanerinit piumasaqaatit pillugit isumaqatigiissutit, assersuutigalugu akit, pitsaassutsit amerlassutsillu, imaluunniit annertussutsit eqqarsaatigalugit.”

7. § 5-ip kingornagut ilanngunneqarpoq:

” **5 a.** Suliassatut paasineqassaaq illuliornermi sanaartormilulu suliaasaq, illuliornermi sanaartormilulu teknikikkut siunnersuinerit aamma illuliornermi sanaartormilulu atugassanik atortussanik pilersuinerit.”

8. § 6-ip kingorna qulequtaq nutaaq ilanngunneqarpoq:

”Soqutigisat akkerliinneri”

9. Qulequttap nutaap kingorna ilanngunneqarpoq:

” **§ 6 a.** Neqerooruteqartitsisoq suliariumannittussarsiuussinernup naammassineqarneranut atatillugu soqutigisat akkerliissutaasut suunerinik, pitsaaliornissaannik ikiuuffiginissaannullu tulluurtumik piareersaateqarsimassaaq.”

10. § 7, imm. 1, imatut oqaasertalerneqassaaq:

”Inatsimmut matumunnga ilaasumik sanaartugassanik suliaqarnissamut neqeroorutit tamanut ammasumik imaluunniit killilimmik suliariumannittussarsiuussinikkut imaluunniit isertuullugu neqerooruteqartitsinikkut pissarsiarineqassapput.”

11. § 7, imm. 3, imatut oqaasertalerneqassaaq:

” *Imm. 3.* Neqerooruteqartitsisoq neqerooruteqartitsinissamik piareersaanermi ingerlatsinermilulu aamma suliaqatigiinnissamik tunniussinermi pisussaavoq kinaassusersiunngitsumik, piviusorsioortumik immikkoortitsiviunngitsumillu tunngaveqarluni neqerooruteqartussanik toqqaassalluni aamma neqerooruteqartut akornanni assigiinnigissitsisoqannginnissaa isumagissallugu, tassami neqeroortitsisoq kinaassusersiunngitsumik tunngavissarititaasut mianeralugit inuiaqatigiinni

akisussaasunngorsinnaammat, ilanngullugu najukkani pissutsit najukkanilu tunngaveqarnissaq eqqarsaatigalugit.”

12. § 7, imm. 4, imatut oqaasertalerneqassaaq:

” *Imm. 4.* Suliassanik neqerooruteqarnermi Naalakkersuisut akuerisimasaannik, taamatut peqarsimapput, ataatsimut piumasaqaatit pisortanit akuerineqarsimasut malillugit isumaqatigiissutip suliarineqarnissaa piumasaqaataavoq. Ataatsimut piumasaqaatit allannguisoqarsimappallu ukiup ingerlanerani suut akuerineqarsimanersut ukiut tamaasa januaarimi Naalakkersuisut tamanut saqqummiussissapput.”

13. § 7, imm. 5, imatut oqaasertalerneqarpoq:

” *Imm. 5.* Neqeroortitsisup tamanna kinaassusersiunngitsumik siunertamut iluaqutaassappat, imm. 4-mi aalajangersakkat ataatsimoorussat saneqqussinnaavai. Allannguutit neqeroortitsinermut najoqqutassani ersarissumik allassimassapput.”

14. § 8, imm. 1, oqaasertalerneqassaaq imatut:

”Suliassat suliarinerini akiligassiissutaasartut tamanut ammasumik neqerooruteqartitsisarnermut maleruagassanut ilaatinneqanngillat. Suliassanut suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit suliassaq annerpaamik 500.000 koruuninik naleqartussaattillugu qaqutigunnaq atorneqarsinnaavoq.”

15. § 12, oqaaseqatigiit siulliit ima oqaasertaqassapput:

” **§ 12.** Killilimmik suliariumannittussarsiuussinermi neqerooruteqartitsisoq pisortat neqeroortitsinermut nittartagaatigut neqeroortitsinermik ussasaarutip tamanut ammasumik saqqummiunneratigut neqerooruteqarsinnaasunik aggersaanikkut piukkunnartussarsiorsinnaavoq.”

16. § 13 ima oqaasertalerneqassaaq:

” **§ 13.** Killilimmik suliariumannittussarsiuussinerit suliffeqarfiit aalajangersimasuinnaat pisariaqartinneqartunik taamaallaat piginnaasaqarpata imaluunniit suliassap suliarinissaanut pisariaqartinneqartumik immikkut ittumik ilisimasaqarpata piukkunnartussarsiuussinertaqanngitsumik ingerlanneqarsinnaapput.

Imm. 2. Killilimmik suliariumannittussarsiuussinerit nunap ilaani pissutsit kingunerisaannik najukkani suliffeqarfiit kisimik neqerooruteqarnissaat naatsorsuutigineqarpat, aamma § 25 a, imm. 4 malillugu killilimmik suliariumannittussarsiuussinermut aggersaasoqarsimappat aamma piukkunnartussarsiuussinertaqanngitsumik ingerlanneqarsinnaapput.”

17. § 13-ip kingorna qulequtaq nutaaq ilanngunneqarpoq:

”*Peqataanissamut mattunneqarneq*”

18. Qulequttap nutaap kingorna ilanngunneqarpoq:

” § 13 a. Neqeroorteqartoq imaluunniit taassuma siulersuisuini imaluunniit pisortaneqarfiani ilaasortat neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukiunut tallimanut sunniuteqartumut ukunani pineqaatissinneqarsimappat neqeroortitsinerup ingerlanneraniit neqeroorteqartup peqataanissaanut mattutissavaa:

- 1) Akiliilluni pinerluuteqarneq, peqquserlunneq imaluunniit niuernikkut isumaqatigiinnernik ingerlataqarneq.
- 2) Aaqqissuussaasumik pinerlunniaqatigiinnut peqataaneq.
- 3) Peqqarniisaarnernut imaluunniit peqqarniisaarnermut atatillugu pineqaatissiissutigineqarsinnaasumik iliuseqarsimanerit.
- 4) Aningaasanik peqquserlunnikkut pissarsiarisimasaniq malunnarunnaarsaaneq imaluunniit peqqarniissaarniartarnernut aningaassaliissuteqartarneq.
- 5) Meeqqanik sulisitsineq imaluunniit inunnik niuruteqarneq.

§ 13 b. Neqeroortitsisup neqeroortitsinerup ingerlanneraniit neqeroorteqartup peqataanissamut mattussinnaavaa neqeroorteqartoq:

- 1) akiliisinnaajunnaarsinnaasutut suliarineqarpat, akiliisinnaassuseqanngitsutut imaluunniit atorunnaartussatut suliarineqarpat taamaaqataanilluunniit inissisimappat,
- 2) neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukiunut tallimanut sunniuteqartumut inuussutissarsiutimi ingerlannerani annertuunik sumiginnaasimappat, tassunga ilanngullugu neqeroortitsisumik imaluunniit pisortani oqartussanik allanik isumaqatigiisummini annertuumik sumiginnaasimappat,
- 3) neqeroortitsinerup tamanut nalunaarutigineqarneraniit ullormi kingusinnerpaamik ukiut tallimat iluanni, 2026-mi julip aallaqqaataa sioqqullugu ukiunut tallimanut sunniuteqartumut neqeroorteqartumiit imaluunniit pisortani oqartussanit allaniit ingerlanneqartumut neqeroorummut atatillugu paasissutissanik eqqunngitsunik piaaraluni tunniussisimappat, imaluunniit
- 4) Kalaallit Nunaanni nunamiluunniit suliffeqarfiup pilersinneqarfigisimasaani akileraarutiniq akitsuutinillu akiitsunik akileqquneqartunik 100.000. kr.-t sinnerlugit nalilinnik akiliisimanngippat.

Imm. 2. Suliffeqarfiup imm. 1, nr. 4-mi pineqartup peqataatinneqannginnissaa aalajangiunneqarpat neqeroorteqartitsisup nalunaarutigisinnaavaa suliffeqarfik taamatut pineqartoq mattunneqassanngitsoq, imatut pisoqarpat:

- 1) neqeroortitsinerumi peqataasut tamarmik imm. 1, nr. 4-mi nassuiarneqartutut pisortanut akiitsoqarpata,
- 2) suliffeqarfik 100.000 kr.-t sinnerlugit akiitsut ilaannut qularnaveeqqusiisimappat, imaluunniit
- 3) suliffeqarfik akiitsut akilernerqarnissaat pillugu isumaqatigiissuteqarpat isumaqatigiisummillu taassuminnga eqquutitsippat.”

19. § 15, imm. 1, nr. 2 ima oqaasertalerneqassaaq:

”2) Suliassaq pineqartoq malillugu allanngorartut piumasaqaatit assigiinnngitsut eqqarsaatigalugit aamma illuliorneq sanaartormilulu suliassat, taakkununga teknikikkut ikiuunneq imaluunniit illuliornermut sanaartormullu atortussanik il.il. pilersuineq pineqarnersoq malillugu aningaasaqarnikkut neqeroorut iluatinnarnerpaaq, assersuutigalugu akit, pitsaassuseq, piffissaq sanaartorfusoq, piffissaq pilersaarusiortusoq, ingerlatsinermit aningaasartuutit, imminut akilersinnaanera, teknikikkut nalinga, avatangiisit sunnerneqarneri, illuliassap titartarneqarnera, atorneqarnissaa kiisalu inuiaqatigiinnut akisussaaneq, tassunga ilanngullugit najukkami pissutsit najukkamut tunngassuteqarnera, atuartunik, ilinniartunik suliffimmilu misiliisussanut inissat aamma inuit atugarliortut sulisinneqarneri eqqarsaatigalugit.”

20. § 20 imatut oqaasertalerneqassaaq:

” § 20. Neqerooruteqartitsisut § 1, imm. 2-mut ilaasut illuliornermi sanaartugassanilu isertuussillutik neqerooruteqartitsisinnaannngillat, matumani pineqanngippata:

- 1) suliassaq katillugu nalinga annerpaamik 3.000.000 koruuninik naleqartoq pineqarpat, Illuliornermut sanaartormullu siunnersuinerli eqqarsaatigalugu ataatsimut nalinga annerpaamik 10.000.000 koruuninik naleqassaaq,
- 2) sanaartugassat aatsaat neqerooruteqartitsinermit tunngavigisat najoqqutaralugit ajornakusuungaatsiartumik aalajangiiffigineqarsinnaasunik annertussuseqartut, pitsaassuseqartut piffissalerneqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allanngortiterinerillu, imaluunniit suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaannngitsut,
- 3) suliariumannittussarsiuussinermit neqeroorutini naleqquttunik imaluunniit peqqussutit malillugit suliarineqartunik tiguisoqarsimannginnera, imaluunniit aallaqqaammut neqerooruteqartitsinermit piumasaqaataasut annertuumik allanngortinneqanngippata qinnuteqaatinik tiguisoqarsinnaannnginnera,
- 4) nunap ilaani pissutsit imaluunniit pissutsit allat pissutigalugit suliassap suliarinissanut suliffeqarfiit pingasut tikillugit taamaallaat suliaqarsinnaappata, aamma § 25 a, imm. 4 malillugu isertuussilluni neqerooruteqartitsinissamut aggersaasoqarsimappat,
- 5) suliffeqarfiup aalajangersimasup toqqarneqarnissaa tunngavissat immikkut ittut allat aalajangiisuulluinnartippassuk, imaluunniit inuiaqatigiinni eqqarsaatigisassat, tassunga ilanngullugit najukkani pissutsit aamma najukkami tunngaveqarneq eqqarsaatigalugit, suliassap isertuussilluni neqerooruteqartitsinikkut najukkami suliffeqarfimmut neqeroorutiginnissaa aalajangiisuulluinnartippassuk.”

21. § 24, imm. 3, oqaasertalerneqassaaq imatut:

” Imm. 3. Neqerooruteqartitsisup qinnuigineqarnermini neqeroorutip itigartinneqarneranut tunngavisoq pillugu neqerooruteqartunut pineqartunut § 13 a, § 13 b, § 15, imm. 3 aamma § 22 naapertorlugit nalunaarutigissavaa, taamatut tunngavilersuut § 25, imm. 2 naapertorlugu nalunaarutigineqareersimanngippat.”

22. § 25 a, imm. 1, oqaaseqatigiit aappaat ima oqaasertaqassapput:

”Siumoortumik nalunaaruteqarneq pisortat neqeroortitsinernut nittartagaatigut tamanut saqqummiunneqassaaq.”

23. § 25 a, imm. 4, oqaaseqatigiit aappaat ima oqaasertaqassapput:

”Suliassamut neqeroorutit pissarsiarinissaannut neqeroortitsisup aallartinnissaa sioqqullugu kingusinnerpaamik sapaatit akunneri sisamat sioqqullugit siumoortumik nalunaarut tamanut saqqummiunneqassaaq aamma sulinerit imaluunniit suliassat suut ilaanersut, sumiiffik aamma naammassineqarnissaanut piffissaq kiisalu soqutiginnittut saaffiginninnissaanut piffissaliussaq pillugu paasissutissanik imaqaassalluni.”

24. § 35, imm. 1, imatut oqaasertalerneqassaaq:

”Illuliornerit sanaartukkallu suliarineqarnerinut atatillugu aamma taakkununga teknikikkut ikiuunnermi ilinniartut, suliffimmi sungiusartut assigisaalluunniit qanoq amerlatigisut atorfinitsinneqartarnissaat pillugu Naalakkersuisut maleruagassiorsinnaapput. Ilinniartut pillugit malittarisassat eqqortinneqanngippata ullormut akiliititsinissanik allatigulluunniit pineqaatissiinissamut Naalakkersuisut aalajangersaasinnaapput.”

§ 2

Inatsisartut inatsisaat ulloq 2026-imi juulip aallaqqaataani atuutilissaaq.

Imm. 2. Peqatigisaanik pisortat oqartussaaffigisaanni suliffeqarfiinilu nioqqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaanni nr. 6, 12. juni 2019-imeersumi § 2, imm. 3 atorunnaarsinneqarpoq, aamma § 3, nr. 1 ima oqaasertalerneqarluni:

”1) Illuliornermi sanaartornermilu suliat, illuliornermi sanaartornermilu sulianut teknikikkut ikiuunneq aamma illuliornermi sanaartornermilu sulianut atortunik il.il. pilersuineq.”

Namminersorlutik Oqartussat, ulloq xx. xxx 2026

Jens-Frederik Nielsen

Naalakkersuisut Siulittaasuut